



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 8



Amit Shah-i Jammu & Kashmir nung security tensa asadang

National Shooting Trials: Manu Bhaker-i gold ana angu



VOL. XX NO. 92 (ADOK 92) DIMAPUR KÜPTOKNÜ (SATURDAY) AENJETI (JANUARY) 14, 2023 ₹ 5.00

NPAC-i tanü Nagaland mokdangtsü aliba thinener

Dimapur, January 13, 2023 (TYO): Nagaland People's Action Committee (NPAC)-i January 14, 2023 nü Nagaland ajunga mokdangtsü ayongba thinenogo.

Hokolbar nikonkdang Dimapur nung NPAC indang rondak senden ka amendang iba lemtet agi.

January 17, 2023 nü Naga kin 8 indang senden amentsü lir ta Central Nagaland Tribes Council (CNTC)-i osang sangoktsü aser iba jagi NPAC-i mokdang ayongba thinentsü lemtet, ta NPAC-i taonung sangdong ka nung metetdaksü.

NPAC-i mokdang magiteta alizüing takok nguogo ta bilemer kechiyong iba yimyim janga sendaka alirtem akasodaktsüogo. Nagaland nung kin hohotemi sensosangertem tsüingdang tamakok maludaktsüta ta teimla nung January 14 mokdang athir ta parnokisa ashi.

Election magidang Naga yimten latettsü atema noktaker ajak den NPAC-i maneni yariteptsü, ta parnokisa ashi.

Nagaland nung telok aser kintem indang külem sabang tajung ka maliba agi June 21, 2022 nü Nagaland Gaon Bura

Federation (NGBF) kübok kin hoho aser CSOs 72 tashi adenshia senden amendang NPAC tentet telemtetba agia liasü.

Iba luden nung Theja Therieh Convener ser loktii lemtetba ama olemtep nung adener ajak dang tekaratiba nung yimten latettsü tayongzükba agütsüta atema tashi agütsü. Naga yimten olemtep tembbangba den külemi NPAC tembangtsü.

Küm 26 tashi olemtepa aruaka yimten melatetba agi Naga NGOs, society organisations aser kin hohotemi tesüiba küm 25 tashi shiditem zülua arur. Iba onük atema Nagaland nung mokdang aser public sentong balala agiogo. Iba tangatetba nung January 12, 2023 nü Dimapur nung NPAC senden amendang January 14, 2023 nü ghonda 6 mokdangtsü lemtet, ta NPAC sangdong nung shia lir.

January 11, 2023 nü kin 14-i sangdong agtsüba nung India sorkar dang Naga yimten memenui latettsü shia liasü. Iba kasa tangatetba nung NPAC-ia külem taginüba ta angateta January 14 nü state ajunga mokdangtsü lemtet, ta NPAC-isa metetdaksü.

Advisor Khehovi-i Rs 119 crore alang tourism mapatongtem sayatsü

Kohima, January 13, 2023 (TYO): Tourism and Art & Culture Advisor H Khehovi Yeputhomi-i Nagaland nung Rs 119.88 crore alangba mapatong 7 lapoktsüogo.

Item mapatong ya Swadesh Darshan aser Prasad schemes kübok Ministry of Tourism, Government of India ajanga Nagaland tesem balala nung yangluba lir.

Mapatongtem rongnung Aizotu, Zunheboto district nung Rs 650.84 lakh endoka Pilgrimage Facilitation Centre lir. Iba ya Pilgrimage Rejuvenation And Spiritual Augmentation Drive (PRASAD) scheme kübok inyak.

Ano, Swadesh Darshan kübok tribal circuit projects 6 inyak. Itemji Dikhu Eco Resort (Longleng) - Rs 693.72 lakh, Tribal Circuit (New Peren) - Rs 3316 lakh, Tizit Eco Resort (Mon) - Rs 457.89 lakh, Ungma Tribal Hub (Mokokchung) - Rs 2804.32 lakh, Suteplenden Waterfall (Mokokchung) - Rs 510.91 lakh aser Doyang Eco Resort (Wokha) - Rs 3554.60 lakh lir.

Tanü anüingdang Tourism Department conference hall nungi Advisor Yeputhomi-i online ajanga mapatongtem sayatsü.

"Item mapatong ajanga tourist temi nüngdakattem peritsütsü aser tourism ajungkettsü. Iba ajanga rongsenketzüng renloktsü aser mapa inyaktsü maongka talila angutsü" ta Yeputhomi-isa ashi.

Yeputhomi-isa Ministry of Tourism dang Swadesh Darshan Scheme tenzüksüba atema pelaba metetdaksü.

"Swadesh Darshan Scheme ya theme-based tourist circuit lir aser Prasad scheme ya Nagaland aser Northeast nung tamangba yimsü dak sendakattem tesentem atema lir" ta paisa shisem.

Iba sentong nung Tourism Department indang Additional Director, Viyelo Doulo menden liasü, Director K M Rio-i tesentepertem pelaa agizük, JE Rokovituo Tep-i mapatongtem indang osang lemsatet aser Deputy Director Toka E. Tuccumi-i anküp tepela o jembii.

Mkg nung Republic Day atema senden ayonger

Dimapur, January 13, 2023 (TYO): Mokokchung District kübok office ajak nung tekolakpurtem aser Administrative officers (HQ) ajak January 16, 2023 nü senden ka amentsü metetdaksüogo.

Sendenji Mokokchung Deputy Commissioner office

indang conference hall nung anepdang 11:00 ako amentsü aser 74 buba Republic Day benjung atema jembitsü ta DC Shaahank Pratap Singh, IAS-i sangdong ka nung metetdaksü.

Iba senden nung ketdangsur ajak arua adentsü mepishir ta Mokokchung DC-isa ashi.

ECI telok ka Nagaland nung arua lir; Political party tem den ajurutep



January 13, 2023 nü Kohima nung Election Commission of India (ECI) teshimtet telok kati Nagaland assembly elections atema telok balala den ajurutepa sensaksemba angur.

Kohima, January 13, 2023 (TYO): Nagaland assembly election agitsü osang ano mesangdongdang Election Commission of India (ECI) teshimtet telok ka Nagaland-i aruogo.

Züingsem 16 agi akümba ECI telok ka tanü Kohima tonga aruogo aser parnok anogo ananü amongtsü.

ECI telok nung Chief Election Commissioner Rajiv Kumar aser Election Commissioner ana-Anup Chandra Pandey o Arun Goel na dena lir.

Tanü parnok atongba sülen de Oriental Grand nung Nagaland nung aliba political party tem den senden ka amen.

Idangji Nagaland nung political party temi election tiptema agitsü mepishi aser Congress-ibo EVMs melena ballot paper amshitsü ashi.

Nationalist Democratic Progressive Party (NDPP), BJP, Nagaland Pradesh Congress Committee (NPCC) aser Naga People's Front (NPF) lennirtem

dang asüingdangdang ECI teshimtet teloki assembly election agitsü anogo kecha mashi langzü.

"NDPP-i ECI ketdangsurtem dang onok Naga nung taginüba atema noktaker aser election matongdang Naga yimten latetdaksünür ta shiogo. Ajisiuaka ECI-i elections agitsü anogo sangdongra onoki shilem agitsüsa akümtsü" ta NDPP vice president Kelhouneizo Yhome-i ashi.

"BJP-i ECI dang electiona tiptema aser tashishitsü melii agitsü atema ozüing amertem tashi itdaksütsü mepishiogo" ta Nagaland BJP spokesperson Nini Cheng-ia ashi.

"BJP-isa ECI dang polling stations nung tashiyim inyakba ken o tem atema mapa inyaktsü mepishiogo" ta Nini Cheng-isa ashi.

Nagaland Congress lennirtemia ECI nem shidi ka agütsüba nung Electronic Voting Machines (EVMs) mamshitsü shia lir.

"EVMs nung voter-i kuli magütsüter aser vote ji pa/lai

enoktsüba candidate dangi ao asü mao meshiteter. Ano ECI-ia vote ji candidate nem agütsü asü masü kuli magütsüteter" ta NPCC-i shidi nung shia lir.

"Anungji closed room ka nung voter kati Balloting Unit nung nemer Ballot Paper ama ka amshitsü atema Voter verifiable paper audit trail (VVPAT) printout ka angutsüla. Iba nungji candidate tenüing, maitsü aser stamp jangjaba sülen ang Presiding Officer tsüingdang aliba ballot box nung enoktsütsüla" ta NPCC-isa ashi.

Congress-isa Polling Station nung candidate tem indang polling agent tem Counting Agents ama counting asü nung junger, ta NPCC-isa ECI dang ashi.

Koda masü polling station kar nung counting mesütetra, tasüingji Returning Officer indang Office Counting Hall nung asütsüla, ta parnokisa ashi.

"Election tiptema agitsü atema onoki voting ballot paper amshitsü teti akhangtsü" ta NPCC-isa metetdaksü.

Longpok semchirtemi Aor aser Naga nung ajungtsü asoshi inyakdi: Sharingain

Ungma, January 13, 2023 (TYO): Tsürabur mapang nungi Longpok semchirtemi ajak den putepputepa yimjung nung liromedema lia aru. Tanü putu nunga kasa tangatetba nung iba yimyai bentshia ajak den libalirotsüla aser ibaji Longpok semchirtemi alakteta khuret ka ama agidi ta Nagaland Legislative Assembly Speaker Wb. Sharingain Lkr-i ashi.

Hokolbarnü Ungma yimtak 7 Buba Longpok Semchir Telongjem Inti Mungdang nung tayongzükba o jembidang Wb. Sharingain-i iba ya ashi.

"Tsüingremi Longpok semchirtemi kanga dang meimer kechiaser Nagaland nung 1964 küm nungi election agir arudang assembly ajak nung Longpok semchir kabosa dena aliba angur. Tang aliba assembly nunga Longpok semchir asem tashi aliba ajanga Tsüingremi Longpok semchir moatsüba kuli

angur. Anungji iba temoatsü dak ajemdaker Tsüingrem tenüing sanga tali longjemshir asen Ao kin aser Naga nung ajungtsü asoshi inyakdi" ta paisa ashi.

Tanü iba sentong nung Tebu Teti Aochuba Longsa-i "Lipok Tamendakdak Arangshi" onük jembii.

Maneni, Longjakrep Semchir Mungdang Tir Wb. Imolemba Jamir-i tepela o jembii aser Ungma Longpok Semchir Telongjem, Elangtsürtemi sobaliba ken ka aten.

7 Buba Longpok Semchir Telongjem Mungdang inti Mungdang nung renemba pangzüng tongtipang kaji Longpok semchirtemi rongnung kibalembu masütsüba lir.

Longpok Semchir Tarsen Longkumer, Lemtur, Molier, Nokdir, Ajemer, Walling aser Longchar asütsü. Itemji tesüiba mapang shirnok lia aruogo itemji maliyim ta memetetba mapang

nung lia aru, anungji itemji mashishir aser mamshir saka January 13, 2023 anogo nungibo shia aliba tebou tarsen dak nungi jakzükertem den Longpok semchir shinga kibalembu masütsü ta mungdangsangeri bangjemtepa ayu.

7 Buba Longpok Semchir Telongjem Mungdang Ketdangpurtem yamai shim:

1. Tir - Wb. K. Nokmarenba (Longsa)
2. Tatong Tir - Wb. Imnekenba (Longjang)
3. Tongti Zülur - Wb. Imkongnungba Lkr (Merangkong)
4. Repsem Zülur - Wb. Bendangwapang (Waromung)
5. Sen Zülur - Wb. Lanuwapang (Khar)
6. Sen Repsem Zülur - Wb. Amongsang (Longkhum)
7. Kimen - Wb. Imotemjen (Chungtia)

NBOCWBB-i Media Fellowship 2023 tenzük



NBOCWBB-i Media Fellowship 2023 tenzüksüba mapang HoD IPR, Dzuvinuo Thetino, Chairman NBOCWBB, Kekhrie Yhome nungertem külemi noksa nung angur.

Dimapur, January 13, 2023 (TYO): Nagaland Building & Other Construction Workers' Welfare Board (NBOCWBB)-i January 13, 2023 nü Media Fellowship 2023 tenzükogo.

Iba sentong ya DIPR Conference Hall, Kohima nung agi aser mendenji Chief Executive Officer, NBOCWBB Dr. T. Chubayanger liasü.

Iba sentong takok anguba ajanga NBOCWBB-i Media Fellowship 2023 alitsü lemtet, ta Dr. T. Chubayanger-i ashi.

"Mezüngbuba media fellowship nung construction workers indang khurettem lemsatepa liasü aser iba sentong kanga takok ngua agi. Iba jagi NBOCWBB-i Kohima Press Club (KPC) aser DIPR nem fellowship agütsü lemtet" ta NBOCWBB Chairman Dr. Kekhrie Yhome-ia ashi.

"DIPR-i building aser construction wadangtem nung Nagaland nung Immigrants Workers aser Internal Migration indang documentary ana yanglutsü. KPC-i feature writing/reporting, Photojournalism aser Video journalism nung fellows/awards tenzüksü" ta Dr. Kekhrie-isa ashi.

"Department of IPR tenüng nung Media Fellowship 2023 ya

maongka ka ama agizüker. Department nem iba maongka agütsüba ya tayongzükba ka lir aser department-i public dang Production tajung ka sayutsü" ta Head of Department, IPR Dzuvinuo Theünuo-i ashi.

Naga nung dak documentary production atema sempet tajung lir, ta lai ashi.

"2022 nung department-i Nagaland nung production houses tajung ana nem Public Service Announcements (PSA) ana yanglutsü lemküksü. NBOCWBB-i mapang tatsüka nung osang sangoktsünübaji tayongzükba tulu ka liasü saka iba mapa tajung inyakba atema parnok nem tenüngsang agütsür. Talisa DIPR video production dang masü saka Kohima Press Club anioksemba atema pelar" ta Theünuo-i metetdaksü.

"Public-i unorganized sector terabo nguogo aser anogoshi aayangertemi tsüngsang-mopung mejungika kanga dang meranga asentzü sena mapa inyakba atema tenüngsang agütsür. Sorkar mapa dak alia ni unorganized sector nung inyakertem khuret lemsatepsü atema mapang agüja inyakogo. Sorkar indang welfare schemes balala indang tajangzüktem nübor metongra department-i

Kohima DC-i Mobile Demonstration Van (MDV) tenzüksü

Dimapur, January 13, 2023 (TYO): Kohima Deputy Commissioner aser District Election Officer Shanavas C, IAS-i Mobile Demonstration Van (MDV) tenzüksü.

Iba ya 14 buba Nagaland Legislative Assembly election 2023 dak sendakba nung Systematic Voters' Education and Electoral Participation (SVEEP) Campaign nung

shilem ka ama agi.

Mobile Demonstration Van (MDV) ajanga Kohima jila kübok tesem pungu nung Electronic Voting Machine (EVM) aser Voters' Verifiable Paper Audit Trail (VVPAT) amshiyim sayua liasü.

Iba sentong nung electors 89-i shilem agi aser NLA 2023 election atema tetsü oshi nung election tiptema agütsü osang prokshi.

iba atema inyaktsü" ta laisa ashi.

"Loktiliba nung KPC dak tashi lir anungji nenoki public aser policymakers dang anogoshi aayangertem indang khuret metetdaksütsüla. Department-i NBOCWBB nem akokba tashi teyari agütsütsü" ta Theünuo-isa shisem.

NBOCWBB-i KPC nem media fellowship agütsüba atema Kohima Press Club Media Fellowship 2022 Convenor Rita Krocha-i pelaba metetdaksü.

"Taküm feature writing/reporting dak alia NBOCWBB-i Photo Journalism aser video Journalism tenzükba ajanga public nem osang agütsüba maparen tajungba akümsü" ta Krocha-isa ashi.

Iba sentong nung DIPR aser KPC den NBOCWBB-i Contract Agreement nung sign sütep.

YAA 57 buba Lokti Mungdang tembangogo

Dimapur, January 13, 2023 (TYO): January 12, 2023 nü Pungro jila nung Yimkhiung Akheru Arihako (YAA) indang 57 buba Lokti Mungdang tembangogo.

Iba sentong nung Dy. Speaker NLA T. Yangseo Sangtam-i alakteta jaoker ka ama shilem agia liasü.

T. Yangseo-i o jembidang tarutsü nung tashitaiba akümsü atema adianu ama alitsü tayongzükba agütsü.

"Kaketshirtem dak tangatetba tajung aser temerük alitsüla aser kati ka yariba yimya alitsüla" ta paisa ashi.

YAA Lokti Mungdang Yimkhiung telongtet kübok yimtsüng ajak nungi nisung 4256 tashi aden.

RD Department-i taoba Director den tepila sentong agi

Dimapur, January 13, 2023 (TYO): Rural Development Department ketdangsürtem aser staff-i taoba Director Liboni Humtsoe den tepila sentong ka agiogo.

Liboni Humtsoe-i 1987 küm APO ka ama mapa inyaktsü tenzük aser March 2021 nungi December 31, 2022 tashi Rural Development department nung Director ka ama inyaka liasü.

"Liboni Humtsoe-i la nem lemküksüba mapa takok ngua inyakba atema tenüngsang agütsür. Lai otsü tajung yutsüba den ano temang anema lia mapa nungi sodi agubua atema pelar" ta RD Commissioner & Secretary, Neposo Theluo-i ashi.

"La ya telemtetba tajung agiba, alizüng aliba, temulung lemtet, tangar ajungmesoba aser bendanga agüja inyakba nisung ka lir. Lai tensa tamajung ajurudang timi ajangdangogo aser la nem lemküksüba mapa shitak dang

inyakogo" ta Theluo-isa ashi.

Director (Rtd), Liboni Humtsoe-ia o jembidang la den yariteper ajak dang pelaba metetdaksü.

"Nenoki amalitep aliba, pusema nungitba aser kü dak temulung alemba ajanga ni tasü itta mapa inyakogo. Rural Development department-i maneni nübertem yaritsü tamang akar" ta laisa ashi.

Humtsoe-i mapang tatsüka HoD inyakdang sorkar den yaritepa DRDA yanglushi aser DRDA mapa inyaker nem itasen magütsü aliba agütsü.

Iba sentong nung Addl. Director-II K. Neibou Sekhose, Registrar Kikrulhounuo Solo, Peon Masa aser blocks o DRDAs tenüng nung PD, DRDA, Mokokchung M. Toshimongla Kichu nungeri tepela o jembi.

Sentong nung mendenji RD Director Azenuo Pienyu liasü aser Addl. Director-I K. Shekiho Phulese-i anküp tepela o jembi.

Unnati Skill Centre Kohima lapokogo

Dimapur, January 13, 2023 (TYO): January 12, 2023 nü State Capital Secretariat Conference Hall nung CSR Initiatives Unnati Skill Centre Kohima, UNXT aser Innovation studio mapa tenzükogo.

Iba sentong nung Nagaland Chief Secretary J. Alam, IAS-i tongti tesemdang ama shilem agi.

"Nagaland nung nisung teimba kati sorkar mapa aser tsünisenbongba wadang nung dak metaloka lir saka Nagaland nung lanurtem angazükür, anungji Unnati skill innovation ajanga parnok nem iba sabang agütsür" ta pai ashi.

"Ibala mesükba skill innovation maongka ya lanu putu nem agütsütsüla. Boeing den tesentaktep ayuba ajanga Nagaland tejakleni aotsü anungji iba mapa nung temulung agütsütsüla" ta Chief Secretary Alam-isa ashi.

Alam-isa IDAN Joint Secretary, Renny Wilfred aser pai aniba teloki Nagaland nung nübertem ajangzüksü inyakba atema tenüngsang agütsü.

Iba sentong nung Joint Secretary, IDAN Renny Wilfred, IAS-i tesentepertem pelaa agizüka jembidang Chief of Staff & BGE Lead, Boeing International Praveena Yagnambhat-i Nagaland nung youth empowerment center ka lapoktsü asüngdangba atema pelaba metetdaksü.

"Iba ajanga Nagaland nung Unnati Skill Centre ka lapoktsü sentong tenzük aser Department of Technical Education-i iba mapatong tejakleni aotsü atema facilitating agency ama yaritepba atema

kanga pelar" ta Wilfred-isa ashi.

"Unnati training ya anogo 35 nü agütsü aser 100 percent job placement agütsütsü. Iba course nung GST, Spoken English, Computer Skills, Life skills, Hygiene, Counselling, aser Confidence building lir. Unnati ajanga training agirtem pei pei sempet repranga job placement agütsütsü" ta paisa metetdaksü.

Alemtemshi Jamir, CEO-i anir IDAN tejakleni aoba atema tenüngsang agütsür ta Wilfred-isa shisem.

Iba sentong nung Nagaland Chief Secretary J. Alam-i Boeing ajanga yaria tenzükba Unnati Skill Centre Kohima, UNXT programme for Nagaland, Innovation Studio aser Nagaland nung Government Colleges nung Examination Cell atema Solar power backup lapoktsü.

Iba sentong nungsa Unnati Skill Centre India CEO Ramesh Swamy, Learning Links Foundation Partner Sudeep Dube, Chief of Staff & BGE Lead, Boeing Praveena Yagnambhat, Principal Director, School Education Thavaseenlan K, IAS, Commissioner & Secretary Kenilo Apon, IAS, Higher & Technical Education, Er. M. Nakro, Director, Technical Education aser Higher Education Director Dr. Katoni Jakhalu nungeria o tatsütsü jembi.

Mapatong pezü tenzükba sülen Praveena Yagnambhat-i Chief Secretary J. Alam IAS nem MOU agütsü.

Sentong nung Higher Education Joint Director M. Kire-i anküp tepela o jembi.



Ungma yimtak 7 Buba Longpok Semchir Telongjem Inti Mungdang akadang NLA Speaker Wb. Sharingain Lkr-i jembir aser Ungma Longpok Semchir Telongjem, Elangtsürtemi sobaliba ken atandang tangokba noksatem.



Uttar Pradesh kübok Varanasi yimti nung Tent City anünglen nungi tangokba noksa nung angur. January 13, 2023 nü Ato kilonser, Narendra Modi-i video conferencing ajanga Tent City semzükja liasü.

Budget senden Jan. 31 nü tenzüksü aser April 6 nü tembangtsü

New Delhi, Aenjeti/January 13 (Agencies): Parliament nung Budget senden January 31 nü tenzüksü aser April 6 nü tembangtsü, ta Hokolbarnü Union Minister of Parliamentary Affairs, Pralhad Joshi-i metetdaksü.

Anogo 66 tsüingda senden ajak senteper 27 alitsü aser Union Finance Minister, Nirmala Sitharaman-i February 1 nü Union Budget benoktsü. Tang agi pongubenbuba Sitharaman-i Union Budget benoktsü.

2024 küm Lok Sabha election agitsü lia tang kümsük atema Narendra Modi-i aniba sorkari tang tatembangbuba Union budget benoktsü.

Joshi-i twitter ajanga, "Parliament nung Budget senden January 31 nü tenzüksü aser April 6 nü tembangtsü; anogo 66 tsüingda senden ajak senteper 27 alitsü," ta metetdaksü.

Union minister-i, Budget senden mapang February 14 nungi March 12 tashi khen anena atatsü, aser ibaji department dak sendakba Parliamentary Standing Committees-i grants balala asadangtsü aser ministries aser departments osang agütsütsü atema lir, ta metetdaksü.

Budget mezüingbuba shilem nung Lok Sabha aser Rajya Sabha naprongla nung Tiri

jembiba onük nungi o lemteptsü iba sülen Union Budget atema o lemteptsü.

Budget tanabuba shilem nung ministries balala nem lemzüksüba budget atema o lemteptsü aser sorkari benokba onüktem nung o lemteptsü.

Central Vista project dak sendakba nung tang Parliament building tesüdak lir aser Budget senden tanabuba shilemjibo Parliament building tasenba nungji akatsü imlar.

Taoba Parliament senden nung Lok Sabha nung bill 9 benokba nungi bill 7 agizüka liasü. Rajya Sabha nunga bill 9 agizük aser House anapronglai agizükba bill 9 liasü.

HP nung Congress-i nangzükba ama Old Pension Scheme agizük

New Delhi, January 13 (Agencies): Himachal Pradesh nung assembly election atema nüboyimba mapang nung Congress-i nangzükba ama Hokolbarnü Chief Minister Sukhvinder Singh Sukhu-i aniba mezüingbuba cabinet senden nung Old Pension Scheme agizükogo.

New Pension Scheme (NPS) kübok sorkar mapa inyaker aser pensioners densema mapa inyaker nisung lakh 1.36 dak tema lir.

Election mapang nung Congress party-i, election nung takok ngua sorkar kümra mezüingbuba cabinet senden nung Old Pension Scheme (OPS) agizüksü, ta nangzükba

liasü; ajioda parnoki nangzükba ama atangji inyakogo.

Cabinet senden tembangba sülen osangbenertem den jembidang chief minister Sukhu-i, Old pension scheme kübok tajangzük balalaji tanü nungi agütsütsü, aser iba dak sendakba sangdong ka kobi melii metetdaksütsü, ta ashi.

Paisa, party-i nangzükba ama tetsürtem nem-a ita shia sen 1,500 agütsütsü aser iba maparen atema asalentong yanglutsü asoshi sub-committee ka tentetsü, ta metetdaksü.

Iba committee nung züingsemtemji cabinet minister tem- Chander Kumar, Dhani Ram Shandil, Anirudh Singh aser Jagat Negi nunger asütsü. Iba dak alia state nung mapa

lakh 1 adokdaksütsü atema Committee ka tentetogo.

Old Pension Scheme kübok taküm state senpong nungi sen crore 800 nungi crore 900 shi indoktsü, aser iba atemaji diesel litre shia nung VAT saru sen 3 atutsü.

Sukhu-i, taoba mapang BJP sorkari arrears sen crore 11,000 shi magütsü, iba nungji sorkar mapa inyakertem nem sen crore 4,430 magütsüba, pensioners nem sen crore 5,226 magütsüba aser dearness allowance sen crore 1,000 magütsüba densema lir, ta metetdaksü.

Sukhu-isa, tang state sentsüh crore 75000 lir, aser ibaji taoba BJP sorkari senotsü ketdang mesüeteba aser amajok nung sen indokba agi lir, ta aitsü.

Amit Shah-i Jammu & Kashmir nung security tensa asadang

Jammu, January 13 (Agencies): Hokolbarnü Jammu nung Union Home Minister, Amit Shah-i ketdangsertem den senden mena Jammu & Kashmir nung tensa asadangogo.

Iba senden nungji Lt. Governor Manoj Sinha-a aden.

Tawa Rajouri district kübok Dhangri yimda kiralongrartemi amakdang asür kibong züingsemtem ajurutsü atema Amit Shah Jammu-i aru, ajisüaka tsüingsang majungba agi Shah-i arrtsülen aliba district ji mesemdangteti liasü.

Item lendong nung asür ana tetsü kati, "Union Home Minister Amit Shah-i phone ajanga onok den jembigo. Tarutsü nung pai onok semdangtsü ta pai nangzükogo.

Dhangri amakba mapang nung ozü jabaso anaprong süadokogo. Ni pa (Shah) dang onok nem ochi temeden agüjang aser aibelenertem nem temerenshi agüjang ta mepishiogo," ta metetdaksü.

Jammu nung senden tembangba sülen osangbenertem den jembidang Shah-i, "Ni phone ajanga takoksa angur kibong tenetprongla den jembigo. Ni

iba tesemji tsüingdong tonga oa parnok ajurutsü sentong liasü saka tsüingsang majungba agi mao. Parnoki ashibaji ni züingzünga angaogo aser ni Lieutenant Governor Manoj den-a jembigo," ta metetdaksü.

Paisa, tesüiba küm ka ser tesadang tsüingda Jammu & Kashmir nung tatalokbatem ajak NIA-i bushisüingdangtsü, ta metetdaksü.

"India sorkari anogo ana tsüingda tatalokba anaprong bushisüingdangtsü atema NIA nem nungloktsüogo. NIA aser Jammu Police senteper bushisüingdangtsü. Iba dak alia tesüiba küm ka ser tesadang tsüingda tatalokba ajak bushisüingdangtsü," ta pai ashi.

"Jammu & Kashmir nung security agencies dak sendakba onük ajak nung o lemteptogo. BSF, CRPF, Army mesüra Jammu & Kashmir Police renema dang lir," ta pai shisem.

Raj Bhawan nung ayongzükba amenba senden nungji civil administration aser security agencies nungi ketdangsertem aden. Senden nungji armed forces nungi aser intelligence agencies nungi ketdangsertema aden.

Tanü Sharad Yadav den tatembangbuba asüpila sentong agitsü



January 13, 2023 nü New Delhi nung taoba mapang Union Minister, Sharad Yadav'er kinüngertemi pa tasü mang jakdang mangyimba noksa nung angur. Yadav Brihostibarnü Gurugram nung aliba hospital ka nung asü. Pa arrshi küm 75 liasü.

Bhopal, January 13 (Agencies): Taoba mapang Union Minister, Sharad Yadav den tatembangbuba asüpila sentong Honibarnü Madhya Pradesh nung Narmadapuram district kübok Ankhmau yimda agitsü.

Taoba mapang Janata Dal(U) Tir, Yadav tasü mang par yimda Ankhmau-i bener aotsü aser nikongdang 3:00 ako nung tatembangbuba sentong agitsü.

Arrshi küm 75, Yadav Brihostibar aonung Gurugram nung aliba hospital ka nung asü.

Yadav ya 1947 küm July 1 nü aso aser 1974 küm Jabalpur nung civil engineering renem; pa college azüingba mapang nungi yimtenren nung ajemoka liasü.

1974 küm Lok Sabha by election nung Yadav-i Jabalpur menden nungi takok anguba sülen yimtenren nung jenjang junga aküm.

Party balala nungi lenirtemi pa asüba osang angashia mangyim jashi lemsateptogo aser lenir aikati Ankhmau yim semdanga asür nem akhüm agütsütsü.

Senior advocate aser Rajya Sabha nung Congress MP, Vivek Tankha-i, Yadav asüba ya Mahakaushal division atema takoksa tulu, ta ashi.

Madhya Pradesh Congress Tir aser taoba mapang Chief Minister, Kamal Nath-i, "Sharad Yadav asüba ya loklitiba nung temeden atema raraba tongbang nung takoksa tulu. Pa asüba atema ni jashia mangyimer. Tsüingremi par kibong züingsemtem nem tashi agüjang ta sarasademtsür," ta lemsatep.

Sharad Yadav-i Lok Sabha election nung tenetben takok angu aser Rajya Sabha nunga pezüben tashi MP liasü.



January 13, 2023 nü Maharashtra nung Nashik district kübok Pathare Shivar anasa bus ka truck ka den tsükteptba sülen tangokba noksa nung angur. Iba lendong nung nisung 10 asü aser aika yiruogo.



TIR YIMYIM YIMOBILEM (EDITORIAL)

DIMAPUR

KÜPTOKNÜ,

AENJETI 14, 2023

Meputepnüba telok !

Tanü tashi Naga lima nung kanga rongdak nungdaksa aginüa jembiba ojang anaji, ka yimjung aser tangabaji telongjem lir. Atangji, yimjung o telongjem na ya apuani amai, ka kisung masü külemi alitsüla. Aji oda, putepa alinung dang longjema litettsü aser longjema ali nung dang yimjung nung alitsü. Ajisüaka, Naga nungertembo putepa melitetter, anungji melongjemteter aser melongjemtetba agi yimjung nunga melitetter. Iba ama Naga nunger tia ya kodang jungjunga bilemdangdir, tebang agi telongjem nungdakba indang jembiyonga, temulungjang nungbo Naga nungertemisa meputepnüba lir ta asenok mapa ajanga sayur. Aji oda, Naga numger ajak ya tema nungbo telongjem aser yimjung asoshi inyaker amato, ajisüaka asen leniba nung mesüra Naga nunger ajungtsü asoshi inyakba sentong asüyonga madentsü. Kasaji, telok kari Naga nunger ajangzüksü atema inyakyonga asen dang meshishira aser temelaba magira, asenokbo madentsü. Iba amaji, tang Nagaland People's Action Committee (NPAC) purtemi tanü Nagaland ajunga mokdangtsü ayongzükba sentong nung Naga kintem kari kuli balala agüja onokbo bandh ayongzükba nungji madentsü aser onok lushibo memokdangdaksütsü ta metetdaksüba shisatsü jagi Naga nunger puteptsü atema taremzük tenla tilakata agütsütsü mulunga maliba jakla sayur. Atangji, mulungtet telok ka dang asünungji, NPAC telok nung ya Nagaland nung alirtema Naga kin ajakbo dena malitsüa akok, anungji NPAC lenirtema tetsüng tebang bolua Naga kin shia lenirtema ajurua sensaksema jajatsüla aser telok tentet ka nungsa Naga kin ajak maliyonga tangatetba ka dang süra, iba jagi Naga nungertemi aginüba telongjem aser yimjungji angutsü. Iba tangatetba nung yashi iba yimobilem nung, NPAC telokia tang ama Naga nunger kin ajak lokti sabang ka nung melongjemtetba mapangbo Nagaland rangben mokdangba dang nungibo Naga kin ajak tsüngdong ajurua jajaba tajungba asütsü ta shisalemsatepogo. Atangji, ibaji atema kecha temenu maka, tanüa inyaksü aser asung nungia tenzüka inyaktettsü. Ajisüaka, Naga nungertemi angatettsüba kaji, kari matong aser merajem agibo, sentongji dang Naga nunger ajungtsü asoshi süra, alima tsüngdong Naga nunger tashimait aser melongjem sayutsüasabo asenoki meinyakang tajungba asütsü. Tang NPAC teloki mokdang ayongzükba jagi Nagaland nung election tama masü saka yimten tebilemstü ya tama koka tembangtsüla ta Naga nungertem tejangraba aser taginüba India dang sayutsü tangatetba nung ayongzükba liasü. Atangji, aji NPAC teloki dang masü saka Naga nunger ajaki aginüba onük ka lir, anungji onok dang mashiji mesüra NPAC nung onokbo madenji, NPAC teloki ayongzükba sentong nungji onokbo madener ta odia alima ajaki metettsüa metetdaksüba jagi Naga nunger ajak kanga akoksaogo ta bilemer. Ashi, NPAC dak tashimait alibaji angalemer, aremzüka ola madoki mokdangba ghonda trokji süidaksü asübo alimai Naga nunger timtemba aser taginübaji tajungba angatetla. Asenokbo nüchiso aginür aser yimjung nung longjemaa linür saka iba atemaji temeyonga meküraker ta asütsü na ? Asenokbo Naga nunger yimten 'solution' atema kenüa nübo magütsütettsü na ? Tangarbo pei tetsü taso lima asoshi pei taküma bendanga agütsür. Aji oda, Naga nungertema aika pei tetsü tasoli yimten nüchiso asoshi taküm agütsüogo. Ajisüaka, tanü taküm alir Naga nungertem asenok yabo teimbaka pei tetsü tasoli nüchiso asoshiibo kenüa timtem aser taloksa maremba nübortem lir. Pibo pei tetsü tasoli nüchiso atema arem nung lia rara saka asenokbo ki tajung nung lia gari tajung nung mener o agidang rarar. Iba jagi balaka asenok asoshi longjemtsüba aser puteptsübaji tongtibang masü saka asenok anisüngzüka alitsü atema rongsen-ang tongtibangba aküm südi. Ibayongji, Naga nunger ajungtsü atema lokti sentong ayongzük dang, asenok aikati kechi atema ayongzüker ta asüba nung masü saka shirnoki ayongzüker ta asüba nung rangloker. Iba jagi, mapa tajung aser shitak süaka par teloki ayongzükba nung asenokbo madentsü aser takoksaang aremstü ta asürtemji asenok Naga nungertem lir. Aji oda, Naga nunger melongjemdaksütsü aser yimten tebilemstü tatembang kati arua telatetba magidaksütsü asoshiibo asenokang takoksa aremndi ta bilembaji meputepnüba shisatsü lir. Iba ama shisatsü asenok dak alibaji asenoki koktettsüla. Iba ama tensa tia ka ajurudang, NPAC teloki mokdangba sentong thinenbajia Naga nunger longjemtsü atema tenla tajung ka asütsü.

OLEMSABANG

KECHIBA TZÜ PERIA AJEMTSÜLA (?)



Asenok ajaki metet, asen temang touzük shilem 70 bo tzü ajanga lir, anungji temang anema alitsü asoshi tzü peria ajemtsü nungdaker.

Asen temang shilem ajak nung tzü lir saka tebokbok aser tekolok nunger amala nung timba lir. Asen temang nung digestive systems ajanga azü aser metsü densema tzü tapu balala adokdaksür.

Aiben asenoki tzüraba mapang nungang asen temangi tzü nungdaker ta bilemer. Ibajia shitak saka tawa research agiba ajanga bushitetba agi asen temang nung shilem balalai tzü nungdakba temaitsü aika sayur, aser item temaitsütemji asenoki memetetba ajanga temang nung tashitak aika adoker.

Nisung aika Air-Condition (AC) nung mapang talanglang mapa inyakba mapang metzürar, saka ibaji ajanga asen temangi tzü menungdaker ta mangatettsüla. Tzü peria majemba ajanga-a temang tashi meiti luladoker. Anungji na temang anema alitsü aser sentsü junga akümstü asoshi tzü peria ajemtsüla.

Aonsotsü mesüra süngdong ka aintsü asoshi tzü nungdakba den kasa asen temang aintsü asoshia tzü nungdaker. Asen temang cell telung aser tema naprongla nung tzü peria ayimba ajanga asenok tashi itdaksür.

Tzü ajanga asen temang tenük-telen ajak liromedemdaksüba den külemi temang temperature-a liromedemdaksür. Iba dak alia asen temang nung aliba mim (toxins) densema temang nung aliba tamajungtem asentzü, scü aser natzü ajanga indoker.

Teküp asoshia tzü nungdaker. Anogoshia nisung tain ka temang nungi tzü litre 4 shi indoker, anungji tajemba agia iba denji kasa tzü ajemtsü nungdaker.

Diabetes tashidak anepaluyim :

Diabetes tashidak ya senmang amai menatepba tashidak ka lir, anungji pei tsürabur aser adianutem iba tashidak agi kangshiba otsü lira, pi dang nungibo nasa tekümdangba alitsüla. Ajisüaka, pei tsürabur aser kinüngertem shinga daka diabetes timtem maliyonga, nü dak iba tashidak agi matongtsü ta mali, kechiyong iba tashidak ya nisung ka libaliro aser achiajemba nungi adoker. Chiyongtsü mashimashi chia ajemba, temang touzük talila kümdaksüba, temang marazüki kazüa dang aliba, kanga shisaboluba aser tera dang mejangba amala ajanga temang nung diabetes timtem adoktsü. Peisasa achiajemba aser taküm libaliro nung kümdanga lira, diabetes tashidak nungi kümzüka alitsü melamelar asütsü.

Nisung karbo tar den mesütep temang kanga tulu küma chizüker lir, anungji item dakji temelaba diabetes timtem agi atongtsü. Ajisüaka, ano nisung karbo temang touzükji shitak dang süaka teberem (waist) tulu kümer lira, iba jagi diabetes timtem agi melaa atongtsüa akok. Aji oda, nisung karbo pei tar (height) den medemdangdangbo temang touzükji shitak dang saka teberembo tulu küma teboklen chizüka alua alitsüa akok.. Itemji dakji tebok telonglen temo alitsü, anungji diabetes timtem agi atongtsü ana nung lir. Na tetsür süra akok tashi nü teberem tasazükji inch 33 dak tali tekümdaksü aser tebur sür inch 35 dak tali tekümdaksü. Iba ama kümdanga aliba jagi diabetes timtem ama nungi kümzüker.

Source - Prevention, January 2014.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Portland nung Protestant Tenla ki rongdoktsüsang puogo



Cameron David Storer



PHOTO BY GREG MLHR, PFR PHOTOGRAPHER

January 13, 2023: Portland, Oregon nung küm 117 tejaklen asüba Protestant Tenla ki ka rongdoktsüba atema tawa tebur nungi tetsür akümer (transgender) ka puogo.

Cameron David Storer (Nicolette Fait taka ajar)-i January 3, 2023 nü Portland Korean Arogo Tenla kidang mi senokja rongdoktsüba sülen taoba Hokolbar nungi (January

6) ketdangsertemi Tenla ki bendok tenzükogo.

Arrshi küm 27, Storer apuba sülen ken o ana benokogo. Multnomah County Detention Center nung Storer dang asüngdangyaba mapang nung Storer-i 'lighter' ka amshia Tenla kidang mi senoktsüba aibelen nangzükogo.

"Storer-i, nisung kari pa dang, nai Tenla ki

merongdoktsüra nü temang rangsatsütsü ta ashiba ola pai angashia liasü ta ashi," ta Multnomah County District Attorney Office ajanga metetdaksü.

Storer ya taoba mapang nunga tekolok meshidaki liasü aser oxycodone mozü chia liasü.

1905 küm asüba Tenla ki ya mezümbu German Evangelical Church liasü.

Jan. 15 nü Hebron nung temeja sarasadem sentong agitsü: CNC

Dimapur, January 13 (TYO): January 15, 2023 nü anepdang 9:00 ako nung Council Headquarters Church, Hebron nung aser General Headquarters Church, Naga Army nung nikongdang 5:00 ako nung temeja sarasadem sentong aser Kibuba benjung agitsü, ta CNC General Secretary, Rev. Seksim Kasar-i sangdong ka ajanga metetdaksü.

"Laishiba nung aiben asenoki nüburtemi ayimdenba indang azünger: 'Aluruwa süiogo, mei temogo, aser asenokbo mekümzüki lir,' (Yeremia 8:20). Iba Lai tekong ya shin o ama lir. Iba Lai ajanga mezümbuba aluruwa nung tamakok anguba, iba sülen mei mapang tongti aluruwa mapang nunga tamakok anguba indang jembir. Aluruwa anaprongla nung tamakok ngura aluyimba lima nung ayawara arur," ta Rev. Seksim Kasar-i metetdaksü.

"Ainkari ashibaji, Judah nung Tsüngrem obandang nungi kümzüksü atema Tsüngremi parnok nem akokba tashi maongka peria agütsü, ajisüaka Judah-i Tsüngrem dangi memeyip, ibayongji parnok pei lima melitetsüsa aküm! Yeremia melung kanga raksa, anungji pai kukoa ajep saka memeteba lenmang nungi teyari aru," ta pai metetdaksü.

"Asenok nem maongka kwiben agütsü? British nungeri yimsüsüba mapang asenoki maongka aiben magitet masü no? 1940s, 50s, 60s, 70s, 80s, 90s aser tanü tashi nung asenoki aibelen masü ta ashitsüsa lir asü? Asen lenirtemi tashitait linük aika semdangtetsüsa Tsüngremi alima tesem ajaklen asenok nem yimtenren kishi melapoktsü masü no? Indian

Army tongtitemi yimjak nung 'Naga tebilemsü ken o ya military masü saka yimtenren ken o' ta ashitsüsa Tsüngremi tiyongtsüi aita inyak masü no?" ta pai asüngdang.

"India den yimtenren tsütsü temaba jengang nung Naga ken o jembitsüsa Tsüngremi lenmang melapoktsü no? Tsüngremi asen lima ceasefire ajanga yimjung agütsü masü na? Shibai item ajakji 'nunga' ta shitetsü! Item maongka aiben nguaka Naga nungeri tim teinyaksü meinyak aser aika ochiba sendok. Tejashitsüka linük tenzükertem aser public naprongla nungi aikati rongsen aser tepela bushi," ta sangdong nung shia lir.

"Akhümketa yimtenren latetsü atema asenoki mapang kobika ayimdenner, ajisüaka asenok maneni temenen nung alir! Aibelenertemi ayimdenba shibai akhümstübuttsü? Ayimdenba olaji shingaia mangashitsü. Asenoki temenen mapatem medoktsü tashi asenok dangi kodanga tekümzüka marutsü. Puti otsü nunga Israel nungeri temenen

menaba ajanga Tsüngremi Pai shimteta Israel nüburttem merenshia liasü. Iba denji kasa tanü asenoka merenshir," ta kasa sangdong nung shia lir.

Kibubai yamai ashir, "Kechiyong Kü nüburttem tamashi lir, parnoki Nü memetet; parnok tamachi chirtem aser parnok tangateta kecha mali; tamajung inyaksü parnok shisa aka, saka tajung inyaksü parnoki memeteter," Yeremia 4:22).

"Ajisüaka Tsüngrem dak temeim lir. Pai asenok Pa dangi meyiptsü atema atasar. Anungji tangartem temenen nung maneni liaka asenoki memeni Pa dangi meyipdi. Kodang Tsüngremi asenok dang peladir ano maneni asenok asoshi lenmang lapoktsütsü. Asenok atema ano teimla lir, kechiyong maongka kishiji tang tashi lapoka lir," ta kasa sangdong ajanga metetdaksü.

"Item tayongzükba nung ajemdaker ni NSCN züngsem ajak dang küm tasen nung temeja sarasadem sentong aser Temeshi Kibuba benjung nung adentsü osang metetdaksü," ta paisa mepishia metetdaksü.

Iraq nung Khristan meyrjang aika tang tashi jenshia lir: USCIRF

January 13, 2023: USCIRF-i küm shia Iraq nung Khristantem reshikangshiba osang tejangja report agütsür aser tang tesüsa report nung shia aliba agi, tang tashi Iraq nung Khristan meyrjang aika jenshia lir, ta International Christian Concern (ICC)-i metetdaksü.

Kasa report nungsa Khristantem atema osangtanjung kar sangdonga lir.

"KRG Prime Minister, Masrou Barzani-i Erbil district

nung Khristantem aika aliba tesem Ankawa nung nüburttem nem tashi tulu agütsüogo. Germany sorkaria rara mapang ozüng alema inyakba mapatem atema ISIS züngsemtem anema inyak tenzükogo," ta report nung shia lir.

Ajisüaka Iraq nung Khristantem maneni reshikangshiba ajanga aika tang tashi prokshia lir.

Mapang shia Iraq nung ISIS kiralongrartemi timtem agütsür,

ANOGO ABEN TSÜNGREM DEN

Na tzüRAR asü ?

T.Ken 63: 1-11

Dawidi iba ken pa Yihuda arem tzü makadak alidang zülü. Dawidi tzü maka timtema alidang zülubaji reprangang, "O Tsüngrem, na kü Tsüngrem lir, ni na yakta bushitsü; takong aser tzü makadak tebilemba lima ka nung kü nelai na asoshi tzüRAR aser kü takümi na asoshi yongyar" (t.1). Dawidi züluba oji yamaia ashitsü akok, "Ni yangi takong, tatsük, lendong aliba arem, aser ni atangji tzü ishika aginer. Aji saka, shidakba ni taginübaji Tsüngrem lir."

Kodang nai nesasa na tzü makaba arem ka nung ne taküm lir ta metetra nai kechi inyaksü? Dawidi metetba jengang nungji anidakang. Mezümbuba, pai Tsüngrem bushi. Tsüngrem kidang Pa sentsüwangshi anguba ama pai Tsüngrem ain aser sentsüwangshi ngunü. Pai aremji Tsüngrem alidak kümdaktsünü. Dawidi süki nung liasü. Pai Tsüngrem sentsüwangshi angu saka pai idakji temulung masü. Asenoki Tsüngrem indang angashir temulung asür aser tenla kidang pa ken atener. Aji sür asenok aremi arur. Asenoka Dawid amaji asütsüla aser ashitsüla, "Ni Tsüngrem külemdak Pa sentsüwangshi anguba ama iba arem nunga Pa sentsüwangshi nguner."

Tanabuba, pai Tsüngrem moatsü, "Kü taküm ali tashi ni na asangtsü, ne tenüng nung ni kü teka mekangtsü" (t.4). Ano Dawidi Tsüngrem den temulung süa liasü. Mulungtsü tesülen mapang tia nungi marur. Ibai telunglen temoatsü nungi arur. "Kodang kü yipten nung ni na bilemtetter; aonung tiprong nung ni ne dang shisadanger" (t.6). Tatemsa pai Kibuba dang pela. "Saka chubai Tsüngrem dak pelatsü" (t.11). Ibai Tsüngremi arem nunga asenok nungi aginübaji lir.

Arem nung ajangshiba temetebaji na atema tajung lir, kechiaser iba jagi ne dang tongtipang ochiba sayur: Nai telunglen mulungtsü temoatsü agizüker. Kodang nai taküm nung arem tia ajurudir Dawid yimyaji inyakang. Tsüngremi ne nüngdak agütsütsü.

JESUS CALLS
YOUR SORROW WILL BE TURNED INTO JOY (JOHN 16:20)

NAGALAND PRAYER Festival

CO-HOSTED BY WESTERN SÜMI BAPTIST AKUKUHOU KÜQHAKULU (WSBK)

28 & 29
SAT, SUN 4PM

GOD'S WORD & PRAYER:
Dr. PAUL DHINAKARAN & FAMILY

VENUE: **AGRI EXPO GROUND**
4TH MILE, DIPHUPAR, CHUMUKEDIMA 797115, NAGALAND

COME WITH YOUR FAMILY AND FRIENDS...
Be Blessed...

FOR DETAILS: 93609 04051 / 88263 40055

ENTRY FREE

asir ibaji ajanga Khristantem densema nüburttem pei kidangi meyipa aotsü atema tsübur, ta report nung shia lir.

Iba dak alia Popular Mobilization Forces (PMF)-i mapang shia gari lenmang mokdang aser ibaji ajanga Khristantem Nineveh plains nung pei kidangi aotsü tsübur.

Ano Turkey sepaitemi anünglen nungi northern Iraq amaker aser ibaji ajanga Khristantem densema

minorities nüburttem pei kidangi meyipa mouteter, ta USCIRF report ajangasa metetdaksü.

Küm 10 tejaklen ISIS kiralongrartem merenba sülen tensa süngjemba mapang nungi tenzüka Iraq nung nütüsung ajema aliba nüburttemi pei kidangi meyipa aotsü bilemer saka tensa junga mesüngjemtetba ajanga tang tashi Khristan meyrjang aika jenshia lir.

**AO OSHI ANGAZÜKDAK:
TANÜ ANGAZÜKTSÜBA OJANG**




Ontak

(v) ali nung lao, yipten nung mejanga ali (fall flat)
* Moaba ajungbena tango mesashiteti ali nung ontak.

Ontang

(v) long tendanga yokba (throw stone on trial)
* Asangbai pa teka tendanga long agi ontang.

OLONG PAITEP # 6399



TIPILEN

- 1. Temulung chia akümba - (6)
- 3. Taju kümdaktsü - (3)
- 5. A _ _ _ süng - (3)
- 6. Telok - (5)
- 8. Chiok - (4)
- 10. Tilateri - (7)
- 13. Renloka ao - (4)
- 14. O tetenzük - (5)
- 16. Mapang matong - (3)
- 17. Mebilemtet - (3)
- 18. Tenük nungi aluba tzü - (6)

LANGTSÜNGLEN

- 1. Alu küm rentetta yimer toktsü - (6)
- 2. Ku talang ayu - (3)
- 4. Yimya yimko - (5)
- 7. Anütetsü company tajung ka - (5)
- 8. Ku ongtok - (5)
- 9. Mesüker - (3)
- 11. Mesak - (6)
- 12. Milongsang atsüet - (5)
- 15. Senti yin - (3)

OLONG PAITEP # 6398 TELANGZÜBA


TIPILEN:

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN:


- 1. Tenükjang, 2. Luden, 3. Kioiktsü
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

Noksa nung meputepi aliba 10 bushiang



NAI-A YA METETTER MA

India nung ato kilonser pezübubaji asür Morarji Desai liasü. March 24, 1977 nü nungi July 28, 1979 tashi pai India ato kilonser mapa inyak. Congress masüba telok nungi linük nung mezüngbuba ato kilonserji pa liasü; pa Janata Party Government mapang PM menden nung amen. Morarji Desai ya Gujarat state kübok yimtsüng ka nung February 29, 1896 nü aso aser arishi küm 100 ajungtsü mapang April 10, 1995 nü alima nungi pila.



Manipur: Meitei nungtem ST list nung züngoksemtsü akhanger

Imphal, Aenjeti/January 13 (Agencies): Manipur nung tetsür activists temi Hokolbarnü state kübok Meitei nungertem ST nung züngoksemtsü khanga longkak aitogo.

Tetsür activist temi "onoki temzüng ozüng kübok tekümüzkba akhanger, Meitei/Meitei nungertem Scheduled Tribe list nung züngokseman," ta placard balala nung zülua bener longkak aita liasü. Scheduled Tribe Demand Committee Manipur (STDM)-i ayongzükba sentong nung

shilem ka ama parnoki yimyim balala ayimba iba longkak aiba sentong nung shilem agia liasü. Hokolbarnü Manipur kübok tesem balala nung tetsür shishilem barte mi shishilembadak tesem balala nung longkak aita liasü. Tetsürtemi Manipur Manipur chief minister N Biren Singh dang Scheduled Tribe list nung Meitei/Meitei nungertem züngoksemtsü atema state sorkari tenüngdakba recommendation tem yoktsü khanga liasü. Longkak aitba sentong nung

shilem agiba mapang Singjamei Ima Keithel tir Ningombam Ibetombi-i, tarutsü nung Meetei/Meitei nungertem sama aotsü ana nungi aliba nungi kümzüksü atema ST list nung Meetei/Meitei nungertem züngoksemtsüji kanga tongtibang, ta ashi. Temetetsü kaji STDCM aser International Meetei Forum (IMF)-i ST list nung Meetei/Meitei nungertem züngoksemtsü atema National Commission for Scheduled Tribes (NCST) nem tezüluba nung takhangba ka agütsüogo.

Transportation project tulutem ajanga NE melenshitsuogo: Sarma



koba Varanasi nungi Dhaka ajanger Assam kübok Dibrugarh tashi arutsü, iba tzü lenmang ya-a PM-i lapokja liasü. Chief minister-i ashiba agi, 2014 küm Centre nung Modi-i anir sorkar kümtetba mapang Ato Kilonseri Northeast ajanga transportation ajanga temelenshi bener arutsütsü atema nükla ayu.

"Asenoki railways aser highway nung terenlok nguogo. Tang tzülenmang dak rangloker inyaker aser iba sector-a renloka aoba asenoki ajangshidar," ta pai ashi.

Northeast kübok tesem balala nung project tulutem mapangshia lapokba ajanga terenlok aliba kuli nüburttem nem agütsür, ta pai ashi.

Guwahati aser Dibrugarh na ya G20 senden amentsü atema shimba indang jemiba mapang, taoba sorkar kübok iba amala sentong tulutem yimti tulutem nung dang agia liasü, ta pai ashi.

"Item jenjang agiba atema Northeast nung aliba nüburttem kanga pelar. Linük nijiso anguba sülen terenlok asoshi tang amai inyak asübo asenok jenjang tajungba kümer lila," ta pai ashi.

Sarma-i ashiba agi, MV Ganga Vilas ajanga alima penzürtem nem Assam kübok Kamakhya Temple, Kaziranga National Park, Majuli asetkong aser tea city Dibrugarh nung amala semdangtsü asoshi maongka agütsütsü.

Guwahati, Aenjeti/January 13 (Agencies): Assam Chief Minister Himanta Biswa Sarma-i Hokolbarnü ashiba agi, Northeast nung transportation project tem ajanga temelenshi tulu adokba ajangshidar aser project tulutem mapangshia lapokba ajanga iba kuli agütsür.

Paisa, linük nijiso anguba sülen tang ama terenlok maparen benoka inyak asübo Northeast ajanga kanga kara renloka orr lila, ta ashi.

Guwahati nung Pandu terminal nung sentong ka agiba mapang o jembidang Sarma-i iba olen lemsatepa liasü. Iba sentong Ato Kilonser Narendra Modi-a New Delhi nungi virtually shilem agia liasü.

Sentong nung Modi-i Guwahati nung Maritime Skill Development Centre Alima nung river cruise semzüksü aser iba ajanga

lanurtem nem mapa inyaktsü asoshi maongka tajungba agütsütsü. Paisa, Guwahati nung ship-repairing facility ka asoshi nüngshilong azüngtsü, iba ajanga Kolkata nung amenoker aliba facility temelen ama amshitettsü, rong kiburtem totzü aser nübu intokba tajemba kümdaktsütsü aser mapa adokdaktsüba den local ancillary industry tem ajungkettsü.

Kasa mapang nung Ato Kilonserisa Pandu terminal aser National Highway 27 na sendakteptsü atema lenmang ka yanglutsü asoshi nüngshilong azüngja liasü. Iba lenmang ajanga khu abenba garitem 24/7 senzusenpongtsü atema lenmang lapoktsütsü.

Alima nung river cruise talangtiba MV Ganga Vilas,

Mizoram nung bendanglen nungi bener aruba cigarettes apu

Aizawl, Aenjeti/January 13 (Agencies): Mizoram nung Assam Rifles personnel aser Custom ketdangsurtemi sen lakh 5.2 alang bendanglen nungi shibelener aruba cigarettes puogo.

Bendanglen nungi bener aruba cigarette tem ya India-Myanmar arrtsü anasa Mizoram kübok Zokhawthar yimtsüng nung Brehostibarnü

pua liasü, ta Assam Rifles-i sangdong ka ajanga metetdaktsü. Osang tejangja ka angazükba sülen Assam Rifles sepaitemi Mizoram Custom department den longjemer meita aoba sentong ka ayongzüka agia liasü, ta kasa sangdong ajanga metetdaktsü. Assam Rifles aser Custom department nungi

ketdangsurtemi bendanglen nungi shibelener aruba cigarette tem ya Zokhawthar yimtsüng nung intoker lia nguteta liasü, ta AR-isa metetdaktsü. Sen lakh 5.2 alang cigarette tem ya custom department nem bendanga agütsüogo aser ken o maneni bushisüngdangtsü, ta sangdong ajangsa metetdaktsü.

GOVERNMENT OF NAGALAND
DIRECTORATE OF HEALTH & FAMILY WELFARE
 NAGALAND:: KOHIMA.

NO.DHFW-5/STIPEND/2019-20

/ Dated, Kohima the th Jan' 2023.

NOTIFICATION

SUB:- SCHOLARSHIP SCHEME FOR MEDICAL, NURSING & PARAMEDICAL STUDENTS UNDER THE DEPARTMENT OF HEALTH & FAMILY WELFARE.

It is hereby informed to all the students undergoing medical, nursing and paramedical courses that, the Common Scholarship Portal for scholarship schemes under the Department of Health & Family Welfare will go live (active)w.e.f. 17th January 2023 till 17th February 2023.

The following points may be noted in this connection:-

1. Applicants can access the said portal through the URL:: <https://scholarship.nagaland.gov.in>
2. The Department will accept application through the above cited Portal (online) only. Application submitted in Hardcopy to the Directorate will not be entertained and shall be considered as not applied.
3. Students & Institutions are instructed to go through the guidelines given in the portal before proceeding to fill up the online form.
4. Students selected through NEET/NSEE/State Departmental Examination only and undergoing the above mentioned courses shall be eligible to apply.
5. Students failing to complete their curriculum within the specified duration of the course (repeaters) shall not be entitled to additional stipend.
6. The portal shall be closed from 17th February 2023 and late application will not be entertained.
7. Students & Institutions are hereby advised to fill their online application well ahead of last date to avoid any last minute inconveniences.

(Dr.TEMJENTSUNGLA)
 Principal Director
 Dte. of Health & Family Welfare
 Nagaland, Kohima.

MULUNGNEN O

Asür. Merennungsang MTG 22.10.1954 - 31.12.2022

Teti dang meima aliba Asür. Merennungsang, shirang mapang nungi asüba anogo tashi kija, kibong aser lokti tentet balala agi nübu, rongsen, shisatsü aser sarasadem agi yariba dang masü, ano ozü mulung zürepba mangyimba mapang asüku lemsatepa yariba asoshi ajak dang pelaba lemsateper.

Teyanglur Tsüngremi nenok ajak moajangma.



Temeim kinungsü, Chirur & Kinungsü.

Sri Lanka-i military tashi ajemshitsü sentong yanglur

Colombo, Aenjeti/January 13 (Agencies): Sri Lanka-i taruba küm tashi nung army 135,000 agi tajemba kümdaktsütsü aser 2030 tashi nungbo 100,000 tajemba kümdaktsütsü sentong lir, ta state minister of defence-i Hokolbarnü sangdong ka ajanga metetdaktsü.

Küm neter tsüngda nung tang linük rongsenketzung tamajungba kümer aliba mapang sen intokba tajemba kümdaktsütsü merangba mapang tang Sri Lanka sorkari iba osang sangdongogo.

"Military-i intokba sen ya state-borne expenditure tem lir," ta Premitha Bandara Thennakoon-i ashi.

Iba jenjang agiba nükjidongji 2023 küm tashi nungbo technically & tactically sound aser lenla ajak nung liro medemba defence force yangertsü atema lir, ta Thennakoon-i ashi.

Sri Lanka indang armed force ya 2017 aser 2019 tsüngda kanga aika aküm (317,000) koba World Bank-i ashiba agi, 2009 küm tembangba Liberation Tigers of Tamil Eelam (LTTE) den küm 25 tashi raraba mapang dang nungi timba liasü.

Sri Lanka-i ajak senteper senotsü intokba nung defence sector indang shilem ya 2021 küm timba liasü, iba küm defence sector nung intokba sen ya gross domestic product (GDP) nung shilem 2.31 liasü, ajisüaka taoba küm 2.03 dang aküm, ta Colombo nung amendaker aliba think tank Verite Research sangdong ka ajanga metetdaktsü.

Taoba küm foreign exchange reserves takong küma rongsenketzung nung mepetmesü tulu adokba sülen Sri Lanka nung sorkar expenditure tajemba kümdaktsütsüsa aküm.



Inverness Airport, Scotland nung coastguard search and rescue base ka semdangba mapang Britian Ato Kilonser Rishi Sunak-i Captain Simon Hammock - Deputy Chief Pilot aser crew den ajurutepba noksa nung angur.

Al-Shabab anema Somali nungertemi longkak ait

Mogadishu, Aenjeti/January 13 (Agencies): Brehostibarnü Somalia yimtiba Mogadishu nung Al-Qaeda den sendaktepa aliba al-Shabab telok anema sorkari ayongzükba longkak aitba sentong nung nüburtem noklang aikati shilem agiogo. Iba sentong ya stadium ka nung security kanga junga yur agia liasü.

Somalia tir Hassan Sheikh Mohamud, shibai rally nung shilem agia liasü, pai Somalia nungertem dang al-Shabab telok nungi züngsemtem ajak meshi meshia samatsütsü atema teyari meshia liasü. Pai parnok dang ya atsük (bedbugs) aja.

"Mogadishu nungertem, Kharijites [renegades] tem nenok rongnung lir, anungji parnok mintokang. Parnok ner kidang lir, parnok ner kidangertem lir, nenok den süitepba garitem nung mena lir," ta Mohamud-i Brehostibarnü longkak aitba sentong nung jembiba mapang ashi. Kümtem tsüngda Brehostibarnü ayongzüka agiba longkak aitba sentong nung nisung timbai shilem agia liasü.

"Parnok samatsütsü asoshi tenangzükba ka yangludaktsüner. Parnok ya

asenok süoshi nung atsük mesüker," ta pai shisem.

"Onoki nüburtem tepsetba aser rakzürakdemba extremist tem magizüksü aser onoki tai maketba nisungtem tepsetba magizüksü. Onoki al-Shabab ket nungi parnok kümzüksü. Shirnokisa tai maketba nüburtem tepsetdir parnok anema temzüng ozüng kübok jenjang tapet agitsü," ta Mohamud-i ashi.

"Nisung tepsetba aser temzüng ozüng kübok inyakyim meshidakba agi nüburtem laktetogo aser parnoki al-Shabab pur dang ojang ji ojang ta shia arudar," ta pai ashi.

Par sorkarisa nüburtem dang parnok rongnung lisema aliba telungpurtem indang osang agütsütsü mepeshia metetdaktsü.

Somali tir senior adviser Hodan Ali-i, Al Jazeera dang ashiba agi, "sorkar teyari agia lisopurtemi parnok temeden meyipa agitsü mapang tongja tongogo aser al-Shabab anema linük ajunga nung nüburtemi nokdakba onoki ngudar."

2007 küm nungi alima kintemi teyari agütsüba sorkar anema Al-Shabab puri nokdaka arudar. Parnoki Somalia aser

parnok den raratsü atema sepaitem yokba linüktem nung tesem balala maka arudar.

Iba telok yagi 2015 küm Garissa University nung nisung 166 tepset aser 2013 küma Nairobi nung mall ka nung nisung 67 tepseta liasü, ajisüaka kümtem tsüngda al-Shabab puri Kenya nung tesem balala amakba tajemba kümogo.

Taoba küm May ita tir mendeni atuba sülen tir-i iba telok den raratsü sangdonga liasü.

Somalia sorkar aser parnok den sendaka aliba kintemi taoba küm August ita nungi tenzüka al-Shabab pur tesem aika nungi mintokogo, ajisüaka iba telok yagi telangzüba agüja tesem aika makogo, kong Mogadishu nung bomb pokdaktsüba densema lir.

Parnok anema jenjang tesashi agiaka parnoki maneni Somali kübok jilattem aser military installation tem maka arudar aser iba ajanga parnok tashi sayur.

Küm ter tejakdang Mogadishu aser tanga yimti tongtibangtem nungi mintokaka al-Shabab pur item yimitem nung maneni inyaksangshidar.



National Guard troop, sheriff office personnel aser firefighter temi San Miguel, California nung samara aliba arishi küm pongu tain Kyle Doan bushiba noksa nung angur. Kyle Doan ya January 9 nü tetsüi tzü agi metsünger aliba San Marcos lenmang ajangtsü merangba mapang la indang gari tzü agi aponger aoba sülen sama. Tenaprongla gari nung adok ajisüaka tanobusang ya tzü agi aponger oadok.

Soledar nung Russia nunger maneni nokdangdar: Kyiv

Kyiv, Aenjeti/January 13 (Agencies): Ukraine sorkari Hokolbarnü sangdong ka ajanga ashiba agi, Donetsk tesem kübok Soledar jila nung Russia nungertem maneni nokdangtsü merangdar. Kyiv-i ashiba agi, Moscow-i iba tesemi sepaitem talila yokogo.

"Soledar nung aonung sangwa-a maneni raraogo. Tzükichirtemi Donetsk tesemi yoker aliba sepaitem ajak iba tesemi yokogo aser kanga sashia makdar," ta Deputy Defence Minister Ganna Malyar-i ashiba den rara tang jenjang tamajung ka nung lir ta ashi.

Rara tenzüker küm ka jungnüa aoba mapang Kremlin asoshi nükjidong tulutibaji industrial Donetsk region ya atsüngtsü asoshi lir. Parnoki

linük yimtiba Kyiv atsünga Ukraine sorkar atsüngtoktsü merang, ajisüaka tetsükdaktsü aika ajuruba sülen iba nükjidong yabo toktsüogo.

Russia nunger mercenary group Wagner-i, parnok lenisüba nung Soledar makdar ta shiogo aser iba hopta tetenzüklen parnoki Soledar aziokogo, ta shia liasü.

Ajsüaka Kremlin aser Russian defence ministry napronglai iba hopta tetenzüklen kümdangshitsü asoshi ayongzükba den Soledar nung maneni radar ta ashi.

US nung amendaker aliba military observation group, Institute for the Study of War-i Hokolbarnü ashiba agi, Russia nungertemi Bodhbarnü Soledar atsüngatoker alitsü akok.

33 buba LKM saisapong sentong takok ngua tembangogo

Chuchuyimlang, Jan 13 (TYO): Langpangkong Kaketshir Mungdang (LKM) tenzüker küm 75 ajungba Washimung sentong den repsema 33 buba saisapong sentong Jan 9 nungi tenzüka anogo pungu nü tashi yangi Chuchuyimlang nung takok ngua kaogo. Iba jubilee aser saisapong sentong nung LKM kübok unit 19 nungi tejaoker 1500 dak tali adenshia kanga longsoa mungogo.

Saisapong tatembang sentong nung Akhümdong Chief Information Commissioner Govt. of Nagaland, I. Meyionen Jamir-i jembidang, iba saisapong tenzüker arudang, yangi nungi nungtugu asayar jenti adokogo. Parnok aika asaya ajungba ajanga sorkar mapa dena ngua aruogo. Yamaji yimtsüing balalai meranga asaya aser Aor aser Naga nungertemi Langpangkong nungertemi tetshiba mapang ka liasü. Saka tanü iba tzükong aser Aor asaya jenjang kong lir, ta pai ashi.

LKM saisapong ya tenzüker kümbo 80 tema arur, saka asayamungbo 33 buba dang



Football champion Kangtsung

asayar, aser akhidangbo asaya tapu balala asaya-a aru saka tanübo asaya tapu ana dang asayar, ya terenloker asü teremseper ta paisa tebilemdangtsü onük ka lemsatop.

Iba saisapong ya küm talangka asaya-a arur, saka tajungba renloka maor, anungji, luden kati iba ya kanga junga asadangtsüla aser koba yimya nung asaya nung tangar meneptsü, tajangzüker angutsü, iba indang aroka shisadangtsü

mapang tongogo, ta paisa tebilemba ka ashi.

Alima nung nungtugu football asayar Lionel Messi-i tang tashi nung US sen 1.15 billion aahzükerogo. Peii merangba, pei sempet, pei sasa aziokba aser nükjidong tulu yur litetba taküm ajanga iba jenjangji tongtetba lir. Item senji pai auyaba mesüra mejanga dang lir anguba sen masü, saka temerük lenmang nungi bendenba rongsen lir. Anogo shia ghonta sa ghonta asayar

aser achiajem koba achitsü-majitsü telemtet yur meranga asayar, ta pai atishia ashi.

"Shirnoki saisapong atangji nung janngar, itempur asoshi sports dak sentakba nungdakbatem peria meliaka mesüra sorkar nungi teyari magütsüaka, nungtugu süa asayatetsübaji pei dak dang aket. Na koba agi atsüiter/sota ayur, nai kechiba tangar memeneper, aji bushitettsüla", ta paisa asayartem dang ajungshia liasü.

Inyakyim tasen inyakdangtsü tasü maittetba, nendak-nendaka maneni meinyaktetba, tangsa tang

tajangzüker ngunüba, koba tongtibang aji memetetba, temelaba & tekaraba dang inyaknüba, pei ajung dang asaba, tangatetba maliba, sentong shitak yanglua renemtsü memulungba, tamakok angudang junga masayatet sürnung tamakok kuli balala bushiba, tesüiba tamakok nungi mangazükba, mapang tajung aruba memetet züzüa süidaktsüba, tamakok angutsü tsübuba, sempet tamshi mashiba, aziöka melitetba, pei dak temulung melemtetba, shisatsü aser tangatetba peria makaba, nükjidong tejangja makaba, tasü maitba, sempetbo lir sürnung item kuli balala ajanga tangar menepa masayateter, ta pai melenshidaktsünüba jakla kar tuteta ashi.

Football asaya nung final match Kangtsung o Chuchuyimlang na asayaba Kangtsung-i Chuchuyimlang madak goal 1-0 agi koka taküm football asayamung marok parnoki benogo. Tebur Volleyball asaya nung Changtongya Yimsen pur mezüng aser Changtongya tanabuba jenjang nung liasü. Tetsür Volleyball asaya nung Salulamang mezüng aser Chuchuyimlang tanabuba liasü.

National Shooting Trials: Manu Bhaker-i gold ana angu

Aenjeti/January 13, 2023 (Agencies): Karni Singh Shooting Range nung tang Group A shooter tem atema ayongzüka asaya aliba National Shooting Trials (Rifle/Pistol) nung Olympian Manu Bhaker-i tetsür 25m pistol T2 tetoktepba nung gold medal nguogo. Laisa Mongolbarnü 25m pistol T1 tetoktepba nung gold medal ngur liasü.

Tetsür 25m pistol T2 tenoktepba medal round nung Manu-i Maharashtra nungi asayar Abhidnya Ashok Patil 27-26 agi akok aser kasa asaya

nung Tamil Nadu nungi asayar Niveditha Nair-i point 18 nguteta la tasembuba jenjang nung liasü.

Kasa anogo Madhya Pradesh nungi Aishwary Pratap Singh Tomar-i tebur 50m rifle 3 positions (3P) T1 tetoktepba nung Railway nungi asayar Pankaj Mukheja 17-7 agi koka liasü. Pai anogo tepeyong kanga junga asaya aser qualification asaya nunga pai point 590 ngua pa temaba jenjang nung liasü. Iba asaya nung railway nungisa Akhil Sheoran-i bronze medal ngua liasü.

Tetsür air rifle T2 trials nung

Haryana tsür Ramita-i 16-12 agi Karnataka tsür Tilottama Sen madak takok ngua gold angu. Qualification asaya nungbo Tilottama-i (633.5) asayar ajak dang nungi temaba jenjang nung liasü saka final asaya nung lai Ramita makok. Iba asaya nung Elavenil Valarivan-i bronze medal angu.

Junior tetoktepba nung Army nungi Ramanya Tomar, Haryana nungi Divanishi aser West Bengal nungi Swati Chowdhury nungeri tebur 3P T1, tetsür 25m pistol T2 aser tetsür air rifle T2 trials koka liasü.

Barcelona-i Real Betis koka Super Cup Final-i iogo

Aenjeti/January 13, 2023 (Agencies): Brehostibarnü Spanish Super Cup semifinal nung Barcelona aser Real Betis na asaya penalty metsütepba sülen Barca-i goal 4-2 agi kokogo. Penalty metsütepba mapang Barca keeper Marc-André ter Stegen-i goal ana kümzüker aser Pedri-i tatembangbuba goal idakja liasü.

Iba asaya akokba sülen iba hopta tatem Barcelona aser Real Madrid na Saudi Arabia nung final asayatsü.

Tanga semifinal ka nung Bodhbarnü Madrid-i, penalty metsütepba sülen Valencia madak takok ngua liasü. Penalty metsütepba mapang Thibaut Courtois-i goal ka kümzükerba ajanga Madrid puri takok angu.

"Ter Stegen-i temelenshi adokdaksü. Pai goal ana kümzükerba onok final-i yokogo," ta Barcelona coach Xavi-i ashi.

Final asaya ya Deobarnü

King Fahd Stadium, Riyadh nung asayatsü.

Penalty metsütepba mapang Barcelona puri goa lpezüprongla idaktsü aser Ter Stegen-i Betis nungi asayar Juanmi aser Willian Carvalho nati metsüba ball nokdanga liasü.

"Asaya kanga tasak liasü, Betis puri onok atema kanga tasak kümdaktsü. Tatem nungbo shirnok final tongteteter aji tang tongtibang aser onoki takok nguogo. Penalty metsütepba mapang tia-a nungdaker aser tia onok tsütsü liasü," ta Ter Stegen-i ashi.

Atakzükerba aliba asaya mapang nung team anapronglai goal kaka idakja liasü. Asaya nung mezüngbuba goal ya asaya mezüngbuba shilem nung Robert Lewandowski Barcelona atema idaktsü aser iba sülen Nabil Fekir-i Betis atema goal ka idaktsü.

Mapang apuloktsür asayaba

mapang Ansu Fati-i Barcelona atema tanabuba goal idaktsü saka Loren Morón-i Betis atema goal ka idakja asaya goal 2-2 nung tembang.

Penalty metsütepba mapang Fati, Lewandowski, aser Franck Kessie nungeria Barcelona atema goal idaktsü. Betis pur atema Morón aser Willian José natia goal idakja liasü.

Iba tetoktepba yanglushia 2020 küm Saudi Arabia-i bener aoba sülen Barcelona aser Madrid na tang mezüngbuba Super Cup final asayatsü lir.

Super Cup ya Spanish league champion aser Copa del Rey champion na asaya liasü saka tangbo item tetoktepba anaprongla nung runners-up team-a Final Four asayamung nung shilem agir, koba Spanish soccer federation den tenangzükerba ka yanglur Saudi Arabia-i belenerogo.

Malaysia Open: Prannoy quarterfinal nung tsükogo

Aenjeti/January 13, 2023 (Agencies): India nungter teburtem rongnungi temaba jenjang nung aliba asayar HS Prannoy Hokolbarnü Malaysian Open quarterfinal round nung Japan nungter asayar Kodai Naraoka-i tsükdaktsüogo.

Arishi küm 21 tain Japan nungter asayar yagi iba asaya 21-16, 19-21, 21-10 agi koka liasü. Asaya nung world number 8 asayar Prannoy-i aibelen aika menaba ajanga akoksa liasü.

Malaysia Open nung Prannoy-i mezüngbuba asaya nung külem India nungter asayar Lakshya Sen tsükdaktsü, ajisüaka pa semifinal tonga asayatsü atema timla aliba ya Naraoka-i agintsüogo, shibai India nungter asayar ya amokbanger asaya liasü.

Naraoka-i mezüngbuba asaya ya minute 24 nung dang kokatok, ajisüaka Delhi nungi arishi küm 30 tain asayar yagi kanga meranga asayar tanabuba set minute 34buba nung akok. Deciding asaya nung Prannoy atema Naraoka ya kanga jungrara liasü.

Tatembangbuba asaya tetenzüklen Prannoy aser

Naraoka napronglai points melentepa ngua asaya, saka Japan nungter asayar yagi net nung shot tajung kar asaya-a pa 5-3 agi tejakdang aküm.

Iba sülen Prannoy-i tera tajungba asaya point 5-6 aküm. Malaysia Open tenzüker külen Prannoy asoshi iba asaya ya tasaktiba liasü aser asaya nung asayar ana tsüngda arishi küm tebandang aliba reprangteta aküm aser Japan nungter asayar ya 10-6 agi tejakdang aküm.

Rally talang ka asayaba sülen break tashi nung arishi küm 21 tain asayar ya 11-6 agi tejakdang liasü.

Iba sülenJapan nungter asayar yagi maneni kanga junga asaya aser 17-7 agi pa tejakdang aküm. Kasa mapang nung Prannoy-i aibelen aika mena liasü.

Prannoy-i maneni aibelen aika menaba den asayayonga aoba mapang pa belematok aser 20-10 agi tesülen küma semi nung asayatsü timla aliba samatok.

Tatembangbuba point atema asayaba mapanga India nungter asayar yagi aibelen Naraoka nem takok agüja liasü.

BILEMDANGANG

"Nükjidong atongtsü atema mezüngbuba jenjang agitsü kanga tongtibang."